

會澤靖國文牘卷三

目錄

覆代總統遵飭前敵各軍勿生衝突電

覆代總統申明停戰駐守並未進行電

復南昌陳督軍調和時局電

致南寧陸巡閱使貴陽劉督軍籌商和平電

致南寧陸巡閱使等停戰議和條件電

爲張敬堯等調兵撥餉分致西南各處備戰電

請代總統明令停戰以弭兵端電

請代總統特頒明令一律停戰電

爲北方主戰進兵覆請代總統明白宣示電

切請大總統開布公誠宣示全國電

和平無望分致西南各省準備戰事電

請代總統嚴令曹張各軍停止進攻電

請代總統撤回曹張各軍以昭大信電

挾破武力統一共循政治正軌通致京內外電

覆告代總統竭忠盡直希冀止兵電

請長江三督軍力維和局阻止北軍輕動電

痛論荆岳戰事覆陳代總統電

籌擬和平條件致西南各處備查電

遵守聯合條件致復西南各省軍電

籌商調和事宜致上海岑西林先生等電

復請南京李督軍制止戰端磋商善後電

通致京內外慰留南京李督軍電

覆陳代總統恚後懲前與民更始電

覆陳代總統共息內爭圖禦外患電

擬請代總統罷斥段祺瑞段芝貴等電

爲北方及川軍紛紛進攻報明代總統電

兵連禍結咎有所歸通致京內外電

論南京李督軍辭職一事通致京內外電

希冀停戰商量通致京內外電

復湖北省議會電

川中連戰皆捷致武鳴陸巡閱使等電

其二

通告滇川黔三省靖國聯軍總司令就職日期電

復永寧黃總司令復生等賀任三省總司令電

復瀘州夏司令之時催就三省總司令電

飭石招討使青陽等議復川事和戰電

飭滇川黔前敵各軍保護議和代表電

勸劉存厚交出印信離去成都電

再勸劉存厚等勿蹈反覆速踐前言電

復慰川中各師長等一致護法電

通飭滇川黔軍與劉存厚規約三事電

請馮代總統特任熊克武督川電

促熊總司令錦帆綜攝川省軍民兩政電

覆廣東孫中山電

復重慶章太炎電

致代總統各處陳明出師湘鄂電

通致京省各處冀息兵端而延國脉電

復汕頭陳總司令進攻閩中電

商請西南各省制止中日條約電

因爭中日密約事通令各軍知照電

斥揭段祺瑞弘訂密約請各省合力救阻電

以援鄂事復知上海岑西林電

其一

其三

復日本國議會電

復天津全國商會聯合會電

復南京省議會電

復甘肅省議會電

重明出師本旨訓勵本省官吏軍民電

復北京由幼仙電

以赴渝援鄂事復知王季文電

其一

其二

糾正雲南主義謬說致陸巡閱使等電

覆代總統遵飭前敵各軍勿生衝突電

特萬急北京馮代總統鈞鑒華密佳日接奉有電指示周詳仰見代總統息事寧人之盛心莫名欽服繼堯前接曹李王陳各督軍巧電曾於上月廿八日詳達此次擁護法律之苦衷並經披瀝上陳計邀鈞鑒旋迭接各督軍電催停戰以待磋商當即電飭前敵各軍停止進行靜候解決茲又奉鈞示令各軍駐紮原地勿生衝突謹當仰體鈞旨轉飭遵行惟念國家之安危端賴法律爲維繫必於法律有正當之解決斯國家可望有長久之治安我代總統憂國愛民誠不忍國內再生紛擾應請查核九月十一日繼堯通電所陳四義裁決施行庶可以維持國家之大法安定天下之心至此外應行事宜容俟與陸巡閱使及粵桂湘黔各督軍協商另請鑒核鈞諭解決辦法一星期內當有分曉並請明示俾便遵循不勝迫切待命之至

覆代總統申明停戰駐守並未進行電

特十萬火急北京馮代總統鈞鑒華密前奉有電當即電飭前敵各軍停止前進業於

佳日電陳計邀鈞察頃復由陸巡閱使轉示大總統支電仰見調融內外委曲求全之苦心竊念繼堯等身膺疆寄目擊時艱無日不希望和平爲救亡圖存之計徒以內閣違法致釀爭端同室操戈實深隱痛今我大總統奮伸乾斷俯察輿情廓然大公與民更始敢不仰承鈞旨早日罷兵至鈞諭湘桂之窺岳滇黔之攻川者進行未已警報頻傳等因係未奉令停戰以前之事前因川軍勾結匪徒力攻瀘州等處並進窺綏江幸賴德威旋即擊退嗣奉肴電遵即電飭重慶瀘州叙府各軍即時停戰現均守原駐地點並未進行仍請明令早頒俾雙方有所遵守庶得以早息兵爭共圖國是除復陸使外謹此電陳伏乞垂察

復南昌陳督軍調和時局電

特萬急南昌陳督軍鑒華密庚真兩電敬悉極佩蓋籌並感誠意繼堯此次護法本出於愛國之忱今內競未寧而外交益迫亦何忍忘國家之大患爲局部之爭持承示磋商條件不事苛求以和平爲前提就事實而立議謹當奉此周旋以副我公息事寧人

之盛意前奉大總統着電當即電飭前敵各軍停止進行靜候解決旋奉由陸幹老轉來支電有湘粵窺岳滇黔攻川進行未已警報頻傳等因此實係未奉令停戰以前之事現各軍之在重慶瀘州者均駐原有地點並未進行尙祈代爲轉陳用上紓大總統之眷注尤冀中央早頒明令俾雙方有所遵循庶得以早息兵爭共謀國是特電奉復敬乞卓裁

致南寧陸巡閱使貴陽劉督軍籌商和平電

萬急南寧陸巡閱使貴陽劉督軍鑒固密前接幹老轉示河間支電當即轉致各公尙未及復茲接西林佳電云段派會議天津曠曹變計倡主戰論威嚇南方兼以推倒王閣王陳李三督頗遭疑忌而李尤甚我若因應得宜可以促其分裂鄙意此時暫宜緩提條件惟表示希望和平之意以收拾國內之人心聯絡中部各督之感情一面速組西南聯合機關決定財政外交進行計畫厚我實力爲持久計又接南昌陳督真電云日本出兵攻俄邀我一致行動外交緊迫險若冰淵凡我同舟極應化除私意咸作禦

悔之策至磋商條件請以和平爲前提就事實而立議彼此不事苛求等語鄙意西南聯合各軍近勢日益發展然內憂未息外患迭興吾輩亦何忍以局部之爭持致忘國家之巨患已於本日復電河間表示希望和乎之意至應商條件此時誠不宜極端主張不留轉圜餘地然亦不宜敷衍了事致負護法初心如何因應之處尙乞斟酌見示

致商陸巡閱使等停戰議和條件電

萬急梧州陸巡閱使廣東莫督軍李協和先生貴陽劉督軍停行營譚總司令程總司令黎固密前接幹老馬電所示主旨三端挈領提綱極爲鑿括近迭接曹李陳王各督來電請先停兵再商條件茲又接協和轉來月公艷電亦有陸使電令前方停戰以待磋商條件等語調解時機漸已成熟允宜籌商條件以便一致進行茲將愚見條列如下(一)大總統有故由副總統代行職權事後應即復職否則辭職繼任均須依法辦理(二)國會非法解散不能認爲有效前經宣言自應繼續主張(三)段祺瑞既免職倒閣已不成問題惟改組人員須先徵求西南同意(四)懲辦叛逆禍首並解散其軍隊

(五)護國及此次善後款項應由中央撥給並優給在事獎卹(六)西南各省軍隊現時駐紮情形由西南各省酌定具報以上各條敬候裁決至如周督軍所言此後主張以鄂湘軍權爲重要條件日波督軍所云不宜以調停兩可之空言爲敷衍一時之下策尤爲切要之言並祈諸公統籌詳示

爲張敬堯等調兵撥餉分致西南各處備戰電

十萬急武鳴陸巡閱使廣東分送莫督軍程玉堂李協和先生林總司令陳總司令柳州陳督軍貴陽劉督軍南寧李省長長沙分送譚總司令程總司令并譯轉荊州石總司令鑒成密日初督軍皓電悉我軍日益發展本可以武力解決時局惟河間迭電以寧人息事爲言故各軍皆停止進行靜候解決乃查閱張敬堯及財政部電方調兵撥餉着着進行則河間所言息事寧人是否出於誠意應請同袍諸公一致電話一面仍嚴爲戰備無致墮敵計中此間已嚴詞詰問並將原電譯轉熊使矣謹此復聞並希明教

請代總統明令停戰以弭兵端電

十萬火急北京馮代總統鈞鑒華密頃接粵莫督軍電稱現獲張敬堯致龍濟光電文曰瓊州龍巡閱使鑒華密蒸電敬悉我公出任兼職大局底定可爲預卜堯謬以非材蒙派爲第二路軍總司令率師指日出發戡定大亂諒有同情惟粵中相距寥遠軍情不無睽隔敬祈隨時指示俾作南針無任企禱張敬堯叩巧印等語又財政部致瓊州電文曰龍巡閱使鑒堂密魚電諒達前由交通行撥紙幣十萬元想已收到茲續由中國粵行撥港紙十萬元收到盼復財政部籙印等語前迭奉代總統電諭以息事寧人爲言遵即轉飭前敵各軍停止進行靜候解決茲查閱張敬堯及財政部兩電是中央方調兵撥餉着着進行且聞參陸兩部亦電令周道剛劉存厚鍾體道等調集上游軍隊反攻重慶似此一面電令停戰一面又電令進兵恐失中央之威信又安望大局之和平應請代總統開誠布公明令雙方停戰以維大局而弭兵端不勝切禱

請代總統特頒明令一律停戰電

特萬急北京馮代總統鈞鑒華密寒電奉悉前於本月九日接奉着電遵即分飭前敵各軍停止進行並經電陳在案至滇黔入渝周吳出走係本月四日實在未奉鈞電以前時日可稽絕難掩飾我大總統既存此切望和平之志即繼堯等亦同有維持大局之心第恐左右之人未能仰承鈞旨時存疑忌終起爭端頃聞陸軍參謀兩部方電令周道剛劉存厚等調集上游軍隊尅日攻渝等因是一面電令進攻而一面電令停戰恐非大總統息事寧人之本意應請特頒明令俾各軍一律遵行迫切電陳敬祈訓示爲北方主戰進兵覆請代總統明白宣示電

十萬急北京馮代總統鈞鑒華密有日接奉侵電訓示殷拳實深悚惕伏念鈞座既發倡導和平之議即各省亦同此維持大局之心但使中外同符開誠相示則下令於流水之源未有不推行盡利者前奉電諭停戰當即轉飭各軍停止進行至滇黔聯軍下渝實在未奉電示之先迭經電陳未蒙明察茲復仰承鈞諭自應切實奉行惟鈞座既切盼和平再三誥誡而陸參兩部方電催川軍進攻近聞北京復有參戰督辦之設並

任某某諸督爲各路總司令主戰之說中外紛騰各省莫測高深實滋疑惑繼堯竊見代總統維持國事宵旰憂勤亦嘗默籌所以解決時局之方上紓屨念惟政令既有歧異則承流無所適從敬乞代總統開布公誠明白宣示不勝叩禱

切請代總統開布公誠宣示全國電

萬急北京馮代總統鈞鑒自段祺瑞等專權玩法舉國騷然代總統不忍徇一人之私以拂百姓之欲獨伸乾斷罷黜權奸并迭令休兵以紓國難全國上下咸頌代總統公溥仁明以爲非法內閣既經更迭此後政府當可循法治常軌而國家大政或有刷新之機故西南護法諸省亦皆相戒歛兵靜候解決乃旬月以來前內閣違法諸端未聞矯正而政府措置有足令全國驚疑者敢爲代總統陳之前讀代總統致陸巡閱使支電言芝泉不欲以一身爲衆矢之的夫全國何以集矢於芝泉代總統亦嘗默求其故乎自建造共和國體大定有妄覬摧翻國體者即爲大逆不道之人段芝貴梁士詒朱啟鈴輩朝夕勸進貽誤國家使項城亦身死名墮爲天下戮笑段芝貴等轉得法外遺

遙首又各省迭請懲辦罪魁以謝天下乃段祺瑞營私植黨曲庇叛徒全國皇皇知帝孽未除亂機終伏今禍首尙未伏辜而先以段芝貴長陸軍此全國之大惑不解者一也擁護國家維持統一凡棲息於國內者人同此心若以德綏誰敢不服乃段祺瑞襲專制餘威欲以力爭經營命傅良佐入湘派吳光新入蜀兵連禍結搶攘半年代總統既力主和平寧贛諸督復苦心調解西南諸省漸有蘇息之機乃北京近日復命將出師日籌戰備曹張諸人派兵南下則云防鄂贛匪徒陸參兩部密令進行則云徇劉周電請此全國之大惑不解者二也民國四年中日交涉日人第五號條款欲箝制我國自由購械之權袁世凱以死力爭之卒成懸案國人雖憤袁氏之外交失敗而不能不諒其尙留此一線生機乃段祺瑞竟與某國訂軍械借款合同致激國人之公憤前經寧贛諸督質問而段祺瑞含混答復不足以昭示國人近聞此項合同已在北京簽字此全國之大惑不解者三也我國既對德奧宣戰自應一致進行惟段祺瑞日以挑撥內患爲心豈復能出一兵以禦外侮今復任爲參戰督辦徒令其把持兵柄鋤異己以

釀內訌此全國之大惑不解者四也代總統既洞察段祺瑞爲衆矢之的毅然免其職務以維國是而洽輿情不意政府近日所爲乃效尤而加甚恐非代總統息事寧人之旨亦無以慰海內喁喁望治之心繼堯愚瞽未能仰測高深伏乞代總統開布公誠宣示全國庶以消人民之疑慮而維國家之治安迫切陳詞不勝悚息待命之至

和平無望分致西南各省準備戰事電

萬火急武鳴陸巡閱使上海岑西林先生廣東分送莫督軍伍秩庸唐少川程玉堂李協和先生柳州陳督軍長沙分送譚聯軍總司令程總司令貴陽劉督軍鑒成密迭接日初月波兩公電及此間所得京滬消息北方備戰已着着進行日言和平絕無真意河間以段祺瑞爲參戰督辦實以武力對付西南然詢其名必藉口於參加歐戰用意狡獪即此可知其提出問題詞多含混第三四款用意尤深直欲使各省聯軍不戰自退至召集新國會違法滋弊西林先生刪電論之至悉實獲我心總之河間提出問題不過藉此爲嘗試耳至其近日措置寧復有和平之機現在時局艱危誠不忍國內再

生似擾然北方迫壓太甚亦惟有用武之一途鄙意仍請諸公一面迅將西南主張條件彙請西林先生提出另行磋商一面仍準備軍事積極進行至此次作戰並非局部之爭川省糾紛爲日已久徒礙大局而損鄰交况本屬同袍非難訴合現已互相接洽組織三省聯軍此綫進行如何容當續佈諸公鑒籌所及即乞示知

請代總統嚴令曹張各軍停止進攻電

特萬急北京馮代總統鈞鑒華密前奉有日布告仰見代總統憂國愛民切盼和平之至意又奉江元等日電示命勸告西南各省急圖轉圜共維大局所以責望之者甚殷當即派顧問王兆翔官其彬參議王乃昌楊晉等分赴粵桂湘鄂期以導揚鈞旨解釋糾紛不意罷兵息民方頒明令而曹張派兵南下警耗又復頻傳各省驚疑電請宣示蒙諭以曹張出防初未接近戰線皆聲明靜候命令並非示威今則該軍進攻荆襄又紛紛見告矣不特鈞座威信無以自全設因曹張輕開釁端致釀各方戰鬪則繼堯寧復有置喙之餘地以勸告西南恐此後禍結兵連鈞座不能不首負此責也繼堯爲鈞

座惜爲民國憂故再披瀝以陳伏冀嚴令曹張各軍即日停止以紓戰禍並乞宣示全國以釋羣疑不勝悚息待命之至

請代總統撤回曹張各軍以昭大信電

十萬火急北京馮代總統鈞鑒各省督軍省長武昌王督軍南京李督軍南昌陳督軍上海岑西林先生南寧陸巡閱使廣東莫督軍唐少川伍秩庸程玉堂李協和先生陳總司令貴陽劉督軍長沙譚聯軍總司令程總司令襄陽黎聯軍總司令荊州石總司令重慶熊總司令鑒頃接黎總司令蒸電開現有曹錕兵一團進攻棗陽其前軍已抵吳家店距樊城僅數十里又接真電開隨縣一路除曹錕兵隊外又有第八混成旅繼續前來已於灰日進佔唐縣鎮又由南陽新野一路豫軍勾結趙榮華占踞老河口直窺樊襄各等語查前奉有日布告方冀從此當可弭兵乃曹張各軍紛紛南下各省連電質問而該軍迄未停止進行近更進逼襄樊肆行攻擊是布告所言爾虞我詐者實中央自言之而自蹈之不特無以釋國人之驚疑而亦何以保元首之威信應請代總

統嚴令曹張軍隊尅日撤回以昭大信而戢兵端若不獲命則此後兵連禍結責任自有攸歸謹再電陳尙乞明察

決破武力統一共循政治正軌通致京內外電

北京馮代總統王總理李步軍統領熊秉三先生天津張敬輿先生南京陸朗齋先生上海岑西林先生各省督軍省長歸化張家口承德都統寧夏龍華護軍使各鎮守使各省議會並轉各報館鑒西林先生佳電敬悉立論探原實獲我心敢罄夙懷引伸而道民國成立六年三亂雖南北新舊黨派意見不融皆爲致亂之媒要此不過助因而惟一之主因實坐於當局者主義之錯誤何則辛亥以還全國上下深感統一之必要因保持統一故政象偏重於集權因厲行集權故機括常繫於武力於是北洋系之名詞嶄然露焉一時望風希旨者率倡爲以北洋系爲政治中心以統一國家之說此於理論誠非全無理由要此事非可逞臆而談不能不以事實爲斷夫以地大物博之國家能否實行絕對的武力集權此實疑問藉曰能之而項城以數十年經營幾於近似

卒之威權過重侈心以生遂以是有帝制之役等而下之則段氏效颺力不足而強企故曠督軍團以去國會假復辟以逐總統川湘浙粵且挑撥構禍以爲移植私黨之計迹其悍然不顧蕩軼軌道之外固已絕脛斷脰矣然卒不獲逞而其禍且於今爲烈是故政治中心之說用之吾國蓋已利不勝其弊語曰不知來視諸往又曰琴瑟不調甚者更張夫保持國家之統一何必其在集權又何必其在武力循西林先生所謂政治道德之塗轍而共由之勿欺而犯勿侵以凌使各得於相當範圍之內自謀發育以養成政治上之對抗力由是相漸相摩更相監督以促國家之進步則分權之主義尙焉准此進行分權自分權統一自統一並育而不害相待以有成竊願北系諸君子洞察全局深維禍本放棄其宰割中國之成見則目前之糾紛立解後來之治安可圖不然挾意氣以殉門戶之見李督軍主張和平且不免爲衆矢之的矣奕奕南疆其獲安枕乎憂危告哀伏惟明察

覆告代總統竭忠盡直希冀止兵電

北京馮代總統鈞鑒華密奉電維誦再四不勝惶駭古有人君造命之說罕譬而喻則鈞座今日寧可昌言氣數况湘鄂之戰絕非有不可抗律存乎其間荆襄若不被攻則攻岳之師何由而動此中孰先孰後天下共聞苟非陳死人安能終其臂而又責其不動總之兩軍相攻則變端互誣罵詈亦各極其致此自領兵偏將之常態若夫偏將以上地位不同似不宜效此口臆耳鈞座爲一國之元首非一局部人所得私故擾攘半年南方征繕之餘猶循分盡禮冀鈞座持法以司其直則所以繫天下之望者當何如比聞溲汗大號將有事於南方繼堯誠惶誠恐誠未知罪夫南方揭藥法律橫盡四海豎盡千秋自信可告無罪若必抹殺法律較量勢力挾親疏厚薄之見縱一二人之私慾以力征經營天下則是匹夫無罪懷璧其罪南方孤孽夫復何言然猛虎當前則懦夫越澗必欲蹙人於絕境使之有死之心無生之氣則人非枯朽未必遽易摧拉萬一相持不決日走極端南方自救之謀或不能仍主故常行見七齡民國遂分崩於鈞座之手國固不幸矣鈞座庸獨利焉事有必至理有固然鈞座若猶不忍忿忿則繼堯

之言贅矣不然尙請暫霽嚴威澄思渺慮岳州可念荆襄亦復可憐北洋可存西南亦何可滅勢力之消長孰與國計之安危一時之得失孰與千秋之是非往事已矣若天祚民國從此悔禍則鈞座一令止兵繼堯亦承流諫阻使武漢不再見告從容商量善後正自無難失此不圖則所謂險惡之漩渦捲入者寧獨繼堯今者蜀亂漸平行有餘力不幸而值漩渦居易以俟之而已竭忠盡言不覺傷直干冒尊嚴死罪死罪

請長江三督軍力維和局阻止北軍輕動電

特百萬火急南京李督軍南昌陳督軍武昌王督軍鑒華密變作以來行逾半載外患不顧專事內訌循誦蝸角寓言正恐今日寰中有人齒冷故處今之時真愛國者必主弭兵前以三公鼎力斡旋當相持正急之時忽見停戰布告海內愁慘氣象一時頓化祥和不圖墨瀆未乾荆襄被兵岳亦洩動連類而及又有討伐之布告事機變幻竟至於此哀此中國喪亂弘多逆測後來情勢恐戰禍不息再接再厲人心洩盪失常必至以意氣求勝一切弗顧演成逞忿尋仇之局則民國從此分裂不可收拾矣三國五代

之覆轍其幾蓋起於不讓不幸而關入外力則爲南北朝十六國甚且爲元爲清又甚則今之印緬波韓視元清日彌不及靜言思之不寒而慄今危機已迫如箭在括懼一發之難收故猶欲於呼吸存亡之頃求有萬一之補救平心而論今日之爭持雖各執一一是要之南方之詞旨猶始終在法律範圍之中即不能如量以予亦須由法律範圍中求活動之餘地若漫不省覽動謂要求太甚一味深閉固拒是直撇開法律專講勢力天下後世其謂之何况今日民窮財盡兩方皆然非果有彌滿精力用之不竭不過拮据搜括不足則乞靈於外人比者購械借款北方已有開必先矣相觀而善不汝瑕疵以後兩方皆競走窮途勢不致乞憐外人以求快意不止率一國之人而踵吳三桂李完用之故步不知主戰者是誠何心方當參戰之會內外輕重人心所同故猶願三公於力竭聲嘶之餘痛哭而道使北方一部分有力者稍損其扶植勢力之成見於法律範圍內示南方以容納意見之誠則解決時局尙非無道一面籲懇主座嚴飭前敵暫勿輕動繼堯亦力止湘桂留防待命不得造次椎心陳言乞察並覆

痛論荆岳戰事覆陳代總統電

北京馮代總統鈞鑒豪電敬悉荆襄爲鄂所屬局部討伐敬聞命矣顧荆襄爲鄂所屬岳亦爲湘所屬推而言之則鄂湘及滇黔桂粵皆同爲鈞座所屬以爲局部則何非局部要之地方有局部之爭執國家斷無局部之元首故繼堯之愚以爲局部兩字似非鈞座所宜言况因有荆襄之局部討伐乃有岳州之局部進攻此中進退出入正所謂楚弓楚得在局部雖有勝負在鈞座實無得失之可言來示於荆襄則曰收復於岳州則曰侵佔此豈可爲外人道耶往者不可諫矣斷斷辨晰轉涉不敬惟心所謂危尙不能不按切事實一罄最後之忠言國家之元氣久傷平時借債爲活已瀕於破產之域今討伐未行先之以借款購械一之爲甚又安知不再此之不恤又安禁其他以後恣心相乘恐不致無歎可借無械可購之日討伐終難歇手後顧茫茫誠不知鈞座何以善其後夫不得已而用兵古有明訓若果有必不得已之故則詞嚴義正堂堂之鼓正正之旗吾民雖忍痛斯須亦無可言者若其羗無正義馳騁空詞而猶欲拋擲國命以

殉一時之客氣所謂搏水過額正恐拂性連菑不知所底鈞座夙主和平海內方喁喁望治而六飛於邁遽變初衷俯仰高深疑莫能測伏願開示宏謨俾得要領若曰徒增感喟而已國事非感喟可了當代有清議後世有青史鈞座其謂之何

#### 籌擬和平條件致西南各處備查電

分送上海岑西林譚組安張鎔西孫伯蘭先生分送南寧陸巡閱使陳總司令分送廣東莫督軍李省長程玉堂伍秩庸唐少川李協和先生分送長沙譚聯軍總司令鈕總參謀長岳州程總司令貴陽劉督軍遂寧轉熊總司令鈞鑒成密西林銑電幹老馬電如公有電均悉西林先生與李陳兩督力主調停籌商條件本維持大局寧人息事之苦心乃敵軍又復進犯岳州此時已無調停之餘地惟此間接岑陸兩公電爲時稍遲而擬提條件亦略有出入故仍列舉所見以備參考（一）恢復舊國會（二）總統可一致推戴河間但正式繼任應依大總統選舉法辦理（三）滇川黔湘粵桂各省用人行政須依據現狀容納西南意見惟西林先生所提第三條丙項則萬不宜提出繼堯迭

經宣言絕不就巡閱使職(四)海軍獨立人員恢復原職沿江海各要塞須酌用海軍人員(五)西南各省爲國防計添購軍械中央不能限制(六)恢復黎石原有地位其軍隊仍駐荆襄(七)各省護國護法兩役善後經費由中央籌發以上各端仍請西林先生彙存備查至西南護法各省則惟有積極作戰而已此間現正編撥鄂軍尅日東下進行如何並乞見示

遵守聯合條件致復西南各省軍電

南寧陸巡閱使陳總司令李省長柳州陳督軍廣東莫督軍程玉堂伍秩庸唐少川李協和先生上海岑西林譚組安孫伯蘭張鎔西谷九峯汪精衛章行嚴張溥泉先生貴陽劉督軍行營譚聯軍總司令並譯轉襄陽黎總司令公安石總司令唐司令岳州程總司令重慶熊總司令鑿成密支日接到護法各省聯合條件甚爲詳洽繼堯極表贊同並查明第七條之規定舉行式永永遵守始終不渝特電奉聞

籌商調和事宜致上海岑西林等電

急上海岑西林先生長沙譚聯軍總司令貴陽劉督軍重慶熊總司令鈞鑒成密西林先生佳電敬悉北方武人倡言主戰陰謀復辟時時爲擾亂和平動搖國本之計和議絕不可成即成而彼輩把持政局勢力永存終非國家之幸惟有并力一戰掃蕩廓清以免屢次興兵迄無成效此間擬先定川局即行聯合出師惟國人方渴望頭兵而李督等亦不願輕開戰釁自應先行提出條件以表示西南各省希望和平之誠西林先生所云寧可使彼拒我之求以實其贖武之罪不可由我不爲此請致分其曖昧之譏誠爲至論此間主張條件前已電陳應請諸公一致分電西林先生以便彙集現在西南各省利害既相關切主張亦略同符前接電商各條大概初無異致擬請由西林先生折衷各案擇其犖犖大者酌定辦法徵取各省同意即行提出磋商如政府而納吾請也則如天之福吾輩亦復何求否則訴諸武力亦可以告無罪於天下諸公卓見如何尙乞公酌

復請南京李督軍制止戰端磋商善後電

急南京李督軍鑒華密卅一電敬悉沈痛之言稍有人心莫不感動國勢至此安有再戰之餘力昨上公與秀峯子春兩公灰電所謂乞憐外人以求快意等語豈非將來必至之符耶顧討伐之布告既頒似將來利害已在所不顧惟求目前一逞以爲快充此忿忿之心勢必至愈演愈劇釀成冥心相斫之局則國家從此休矣故鄙意極贊成我公各先停戰之議使殺機不動則平心商權自有解決之道良以兩方之爭執並非根本上絕不相容各就其所執而損益之使即於人可共由之軌轍則尊電所謂或依法理爲去取或視民意爲從違即今日解紛之要道也若不此之圖而惟是挾武力以相尙則是意氣用事其結果非所敢知已事機已迫應如何制止戰端再謀磋商善後之處即乞裁奪進行示覆

通致京內外慰留南京李督軍電

北京馮代總統國務院李步軍統領各省督軍省長承德歸化張家口都統寧夏龍華護軍使各鎮守使各司各師旅長天津熊秉三先生上海岑西林譚組安孫伯瀾先

生廣東李協和先生鑒秀峯督軍魚電誦悉仁人之言感深遐邇願以愛護和平之故再三遷就終至灰心絕望不得已而求去繼堯深爲秀峯督軍惜抑重爲國家痛矣國內政爭事所恒有要勿論如何爭執總應留有調和地步以求最後之解決今秀山督軍引嫌於前秀峯督軍乞疾於後調人之地步盡矣不寧惟是讀魚電討湘有令明知非元首仁恕之初心閉目思之是何景象充類至義之盡尙安有元首更何有秀山秀峯督軍正氣不伸國誰與立夫一人之得失豈可以國命爲殉而一國之存亡要自有匹夫之責用敢敬掬至誠爲國請命願秀峯督軍勿墮匡濟之宏願更願元首式弘仁恕之初心國家幸甚不然和平見疾人有忿心滿地干戈國不國矣

覆陳代總統誌後懲前與民更始電

特萬急北京馮代總統鈞鑒南寧陸巡閱使上海岑西林先生各省督軍省長各鎮守使各總司令承德歸化張家口各都統龍華寧夏各鎮守使均鑒代總統陽電卷日奉悉民國不幸事變相尋推厥禍原皆由叛法自項城盜國海內騷然羣起義師卒除元

憲國是既定天下仰望太平以爲政府必能謀國家之治安循政治之常軌不意合肥柄政違法專權暴戾恣睢罪浮袁氏西南各省宣言護法亦祇求國事得法律爲解決絕無有苛求政府之心代總統主張和平各省已翕然聽命但使約法復生效力則國事已早釋糾紛乃和平之布告方頒而討伐之命令旋下以主戰派之東縛馳驟致代總統不能貫徹其主張反謂和平誤人甚至以不覆項城之大略雄才爲遺憾此不足爲代總統責而深爲民國憂也民國之生命財產爲項城所剝喪者幾何若代總統而猶神遊夢想於項城之淫威則國民將何所託命代總統受人民之付託念國家之艱危誠宜愆後懲前與民更始則所謂國會內閣財政外交諸事要皆有正軌可循即各省共諒代總統實有爲國爲民之誠自無不同心翼贊惟視代總統之措置如何耳仰承明詢謹貢愚誠伏維垂察

覆陳代總統共息內爭圖禦外患電

急北京馮代總統鈞鑒各省督軍省長各都統各護軍使各鎮守使南寧陸巡閱使上

海岑西林先生鑒華密全日奉代總統陽電敬悉外患情形頃復據外電稱俄國既與德人單獨媾和是明明破壞協約難免不爲外人利用侵犯中國邊境西比利亞一帶德俘甚衆尤極危險現日本已決計出兵由東三省出進又據三月一日香港法領事電倫敦日本人團體預料德國當於適宜時機侵入西比利亞預防此事之唯一方法在使日本佔據滿州並派兵出西比利亞云云查外交險惡已迫眉睫此時誠宜共息內爭一致禦外惟自代總統有日布告以後西南各省拱手以聽解決者既數月於茲矣即繼堯電請以和平解決國事者亦不下十數萬言西南各省希望和平之誠當爲全國所共見然政府方壹意主戰譴責李陳諸督討伐譚程諸人遂致戰局重開無復轉圜之餘地代總統乃云國內戰事未已不遑顧及其他試問此次湘鄂戰事有何不得已之故有何不可解之仇乃敵國外患一切置之不顧而謀動干戈於邦內者誰實尸之今國事亟矣代總統欲釋圍牆以禦外侮也唯命欲斃中國以資強鄰也亦唯命繼堯之愚無復有救濟他策也惟代總統圖之

擬請代總統罷斥段祺瑞段芝貴等電

特萬急南寧陸巡閱使廣東莫督軍李省長程玉堂李協和先生陳總司令貴陽劉督軍長沙譚聯軍總司令程總司令襄陽黎聯軍總司令荊州石總司令重慶熊總司令鑾前承諸公囑擬電稿反對兩段當以各處業經分電似可無庸再擬嗣又接各處電催茲特擬一稿文曰北京馮代總統鈞鑒前據京電奉令任段祺瑞爲參戰督辦段芝貴爲陸軍總長等因舉國惶惑未測所由當經分頭電請撤銷事涉旬日未奉明令愈用駭怪查約法大總統統帥海陸軍又宣戰媾和爲大總統之特權今參戰何事大總統實宣告之是大總統即參戰之主任更何得又有督辦有參戰督辦將焉置總統以督辦參戰尙成何國家此種不倫不類之名詞對內則適形其凌逼對外則愈見其輕率况段祺瑞之爲人一年來共聞共見初挑撥川湘亂事以爲己利是其不仁堂堂總理僱募無賴市民圍議院以求逞志是其不智故縱徐州會議藉復辟以推倒總統是其不法唆弄張勳作亂又賣之以爲功是其不義擅訂軍械借款合同援外力以制內

是其無良當國不盈一稔激動內閣爲衆矢之的兩遭擯斥不自愧悔尙召集天津會議對於西南醜然主戰是其無恥以如此不仁不智不法不義無良無恥之人當參戰之重任如國體何如邦交何至段芝貴流品低下人所不齒在前清則藉女寵以干進在民國又倡帝制以興戎穢德彰聞洋溢中外國即無人何致以此小了織入總持兵柄方當參戰之會觀瞻所繫首在軍機務請鈞座權衡輕重毅然罷斥兩段以存國家體面而快一時人心若其事勢牽掣不易徑遂則是權奸把持國政亦安能不早爲之所應請開誠掬示方將勉紆籌策與國人共棄之等語諸公如以爲可用請即由粵聯名拍發

### 爲北方及川軍紛紛進攻報明代總統電

萬急北京馮代總統鈞鑒前奉有日布告仰見代總統維持大局之苦心方冀國內兵戈從茲可息不意代總統乃以段祺瑞爲參戰督辦以段芝貴爲陸軍總長而北京主戰論又軒然而起曹張所部之兵復紛紛南下曾不敢妄加揣測謂代總統徒有和平

之空文而實行作戰之準備惟據各處來電曹張兩軍已在襄樊方面進攻而龍濟光之兵已由高廉窺粵劉存厚之兵亦由富叙攻瀘使曹張等而擅自出兵則代總統何以不嚴行制止使曹張等而有所奉命則代總統何以示信於國人恐返諸代總統息事寧人之初志亦將無以自解况川軍劉存厚等已於本月二日實行進攻本軍實偏處此寧復有退避之餘地當即飭令各路協力反攻茲據各軍報告熊總司令克武所部已將順慶遂寧渠萬一帶敵軍擊退王總司令文華所部已將璧山大足一帶敵軍擊退顧軍長品珍所部已將永川榮昌隆昌一帶敵軍擊退趙軍長又新所部已將瀘州方面敵軍擊退川東川北川南三路略已肅清如劉存厚等仍無悔禍之心滇川黔三省聯軍惟有協同平亂以除禍本而靖地方謹此電陳敬乞垂察

兵連禍結咎有所歸通致京內外電

十萬火急北京馮代總統鈞鑒各省督軍省長歸化張家口承德各都統寧夏龍華護軍使各鎮守使師旅長南寧陸巡閱使廣東唐少川伍秩庸程玉堂李協和先生陳總

司令上海岑西林譚組菴孫伯蘭先生南京陸朗齋先生長沙譚聯軍總司令襄陽黎總司令荊州石總司令重慶章太炎先生熊總司令各省議會各報館均鑒國內戰爭實不祥之事誦荳箕相煎之句不覺內疚神明比月來參戰議與國人內競之心消釋略盡李督軍眷懷國難首倡弭兵義聞仁聲感動遐邇方謂天心悔禍亂庶盪已不圖停戰之布告甫下即曹張南來荆襄見告李督軍且以不安於位聞夫以總統之布告而等於具文以李督軍之調停而因以獲罪國家之紀綱廢墜是非不明一至於此悠悠蒼天曷其有極此後兵連禍結生靈塗炭邦人諸友應知咎之所歸矣國維蕩決滔滔靡屆願國人決心奮起共棄天下之公仇尤願李督軍勉抑高情用存一國之正氣

#### 論南京李督軍辭職一事通致京內外電

北京馮代總統王總理天津黎大總統各省督軍省長歸化承德張家口都統寧夏龍華護軍使各鎮守使師旅長上海岑西林先生長沙譚聯軍總司令并轉黎石兩總司令各省議會各報館鑒奉讀李督軍辭職電有戰必有不得已之故有法不容恕之罪

名然後足以服人心等語不覺喟然浩嘆自督軍團抗命立國紀綱掃地以盡西南數省憫國法之陵夷不得已而出以糾繩然詞鋒僅及於造意之段氏未嘗有一語逾越範圍此心此理雖不慊於亂法之徒要足以質鬼神俟百世而無疑惑矣公是公非自在天壤必欲憑恃暴力妄求一逞一切民命國脈國法人情悍然不顧誠不知其是何居心自古離亂分崩之局率起於一二人之擅權弄法敢於不讓其極乃至意氣求勝是非泯然南北朝五季之流風去今豈遠乎正氣消沈囂凌橫肆以李督軍稍持正論卽已齟齬不休則其他更復何言此後狂流潰決焉知所屆載胥及溺願國人亟起而共圖之

希冀停戰商量通致京內外電

萬火急北京國務院徐菊人熊秉三先生各省督軍省長承德張家口歸化各都統寧夏龍華護軍使各鎮守使南通張季直先生上海岑西林譚組菴孫伯蘭先生南寧陸巡閱使陳聯軍總司令廣東莫督軍陳玉堂李軍長伍秩庸唐少川汪精衛先生汕頭

陳總司令長沙譚聯軍總司令鈕總參謀長岳州程總司令并轉黎聯軍總司令石總司令貴陽劉督軍重慶熊總司令雲南劉師長瀘州葉黃軍長并轉顧趙軍長趙總司令暨各省議會各報館均鑒李督軍卅一電謂以混沌莫名之狀傾覆我國家塗炭我民族痛哉斯言國內政爭何國蔑有其極至於用兵必實有不得已之故吾國此次爭持亦既半年國脈之斷喪民命之戕賊不知凡幾若果爲國爲民是亦可已則已之時乃忽而停戰忽而討伐朝令夕改曾莫測其所由在當局者方歸罪於湘粵軍之進攻岳州而不問進攻荆襄者之首開戰衅方歸罪於荆襄軍之宣布自主而先容稱兵犯闕者之任意橫行公是公非全國共見似此執法豈得云平况購械借款所以爲討伐之備者何一不仰給於外力人之好勝誰不如我萬一尤而效焉將相率而援外力以供內競恐人爲刀俎我爲魚肉惟有自相殘殺以供人之一鬮推今日混沌莫名之狀其流弊必至於此極今國事亟矣惟冀全國上下各儆其羣查照李督軍通電先行停戰然後從容商量條件并查照李督軍通電依法理爲去取視民意爲從違則天下無

不可商之條件矣失今不圖日尋鷄虫得失終貽猿鶴慘化邦人諸友其忍而與此終古耶

覆湖北省議會電

武昌湖北省議會鑒敬電悉天禍吾國事變迭生鄂省居全國之中受禍尤酷頃者北京下停戰布告羣冀從茲當可弭兵乃墨藩未乾而荆襄告警岳州牽動戰燬復開瞻望前途靡知所屆繼堯以國家艱危未堪多難昨復電呈代總統稍霽威嚴爲民請命并請王李陳三督仍出調停未知能幹旋大局否如果天心厭亂亦民國之幸也

川中連戰皆捷致武鳴陸巡閱使等電

萬急武鳴陸巡閱使柳州陳督軍廣東莫督軍李省長孫中山伍秩庸唐少川程玉堂李協和鈕惕生先生貴陽劉督軍長沙譚聯軍總司令程總司令并轉黎石總司令上海岑西林譚組安先生鑒成密川中戰情迭電計達我軍雖連獲勝利而劉鍾周等裹脅甚衆東仆西起猝難廓清以致我軍爲敵所牽未能分兵東下近接荆襄告急當經

電令駐萬軍隊東出夔巫以牽敵勢然兵力不厚杯水車薪終苦無濟歎仄殊深惟有嚴飭前敵各軍早平川亂庶可分拔勁旅進規荆宜茲據各軍電告我軍趙旅長世銘丁司令澤煦已於一月卅一號攻克叙寧熊總司令克武所部喻團王總司令文華所部張團合攻安長已於一月有日佔領又我軍攻克遂寧後因分兵助攻安長敵即乘虛犯遂茲據吳縱隊長超報稱已於勘日完全克復等語現正督飭各軍乘勝急趨以期早拔成都肅清川局即從諸公之後共奠中原特先電聞即祈鑒察

其二

萬急武鳴陸巡閱使柳州陳督軍廣東莫督軍李省長孫中山伍秩庸唐少川程玉堂李協和鈕惕生先生貴陽劉督軍長沙譚聯軍總司令並轉黎唐總司令上海岑西林譚組安先生鑾成密前因荆襄危急特電令駐萬軍隊東出夔巫以牽敵勢惟因川中戰事正急兵力未能多分迭經嚴飭前敵各軍猛力進行早定川局自叙府安岳相繼攻克後我軍乘勝猛進敵勢大摧茲據趙軍長又新報告敵自富順敗潰後我軍跟踪

追擊已於冬日完全佔領自流井顧軍長品珍報告我軍李旅長友勳已於歌日占領內江各等語逆軍屢經挫敗精銳喪亡已盡川事指日可告肅清一俟蜀事收平即當驅兵東出共奠中原特此電聞即祈鑒察

通告慎川黔三省靖國聯軍總司令就職日期電

急雲南蒙自大理衛戍司令官昭通何參謀長蔣司令騰越思茅蒙自各道尹河口麻栗坡督辦各局分送各縣知事均覽迭接重慶熊鎮守使貴陽劉督軍來電以現在川軍加入聯軍宜亟籌軍事統一計書堅詞推舉本督軍爲慎川黔三省靖國聯軍總司令以利進行當經復電力辭茲復來電以大義相責乃於儉日通電就職其文曰上海岑西林先生南寧陸巡閱使柳州陳督軍廣東孫中山伍秩庸唐少川李協和先生程總長莫督軍李省長張方兩師長長沙譚聯軍總司令程總司令襄陽黎聯軍總司令荊州石總司令貴陽劉督軍重慶熊鎮守使王總司令石總指揮官永寧顧軍長永寧黃總司令盧副司令老鴉灘趙總司令瀘州趙黃葉軍長雲南劉師長東川轉送寧遠

張軍長均鑒錦公馬電周公養電敬悉數月來川局不定頗爲進行之梗今錦帆諸君子力排萬難扶義而起西南局勢爲之增重此後同仇偕作益利進行惟川黔滇三省軍事行動關聯複雜非有統一計畫未易收指臂相維之效或轉滋駢枝不仁之虞設聯軍總司令以總其成固勢應爾但職責綦重負荷維艱繼堯猥承推轂自慚陋劣知不堪事願念國難方殷不遑寧息諸公既以道義相純繼堯敢以艱難自諉敬援當仁之成訓藉明臨難之決心茲於本日勉就川黔滇靖國聯軍總司令之職伏望錫我箴言匡其不及至副司令一職亦事實所宜有鄙意仍照錦公原議請周公担任爲禱繼堯叩儉印等語合電知照

復永寧黃總司令復生等賀任三省總司令電

永寧黃總司令復生盧副司令師諦鑒有電悉熊石諸君謬推繼堯總攬師干義不獲辭勉爲担任辱電藻飾彌覺汗顏惟冀諸君匡其不逮共濟時艱斯爲幸耳承迭電促行具佩熱誠擬俟籌備稍有頭緒即進駐永寧以便就近督率所需餉彈業交課分別

接濟

復瀘州夏司令之時催就三省總司令電

瀘州探交夏司令之時鑒陽電悉滇川黔靖國聯軍總司令一職前經重慶熊鎮守使石總指揮官貴陽劉督軍迭電推舉以大義相責迫不容辭當於上月儉日通電宣布就職在案蜀中首義當以執事爲先河尙望聯結同袍以匡不逮

飭石招討使青陽等議復川局調和電

萬火急遂寧石招討使青陽梁山顏司令德基合川楊司令室民瀘州黃總司令復生夏司令之時永寧盧副司令師誦鄭司令英老鴉灘送丁司令澤煦楊司令春芳鑒迭接成都省議會及熊成章趙鐵橋等來電稱現勸劉存厚一致向南已有成議請先行停戰以便派員磋商等語繼堯對於川事向主調和如劉果能向南本所希望惟劉前曾有電到滇均言誠意聯絡而再三反覆迄未踐言此次所言向南殆因迭遭敗創窮力蹙暫借此爲緩兵將來勢力養成難保不再圖反抗劉自上年肇亂不惜倚附叛

徒以固一己之私權而不恤地方之糜爛川省人民顛沛流離之苦皆自彼一人造之每一念及痛若切身且彼對於川中民黨仇視尤深癸丑之役被其籍沒摧殘者尤慘不忍親如劉果得志民黨必無立足之地故鄙意對於省議會調停一層爲目前省事計自應贊同然爲將來大局計則殊多顧慮諸君意見如何尙希卓裁賜復以便決定方針至此間毫無成見也

飭滇黔川前敵各軍保護議和代表電

急重慶熊總司令黔軍朱參謀長瀘州趙葉黃軍長並飛轉雙鳳驛顧軍長永寧盧副司令令儉日接成都省議員趙鐵橋等由資中寄到寒電內稱川戰久延唇齒自毀貽誤大局苦我民生頃川省議會主張棄嫌修好停戰議和黔督既表贊同莫帥諒有同意積公爲顧全桑梓亦願罷兵息民共維國是特具表示誠意書函請托鐵橋等持赴貴軍疏通意見現已抵資因雙方戰綫接觸未便驟進請通飭貴軍特許通行並先電示通過辦法以便早謁旌麾洽商一切至盼等語除復電照准外希即轉飭前敵各部隊

安定通過辦法電由資中縣署轉知該議員等查照通行並嚴飭各部隊妥爲保護勿稍疏虞辦法如何希先電覆

勸劉存厚交出印信離去成都電

萬急成都劉積之兄鑒前於陽日接卅一電云已辭職以軍政完全交付錦帆並飭所部停戰等語當經復電贊成惟迭接成都省議會趙鐵橋等來電皆云執事已成誠意一致向南故陽日復電仍勸執事轉飭所部力踐前言庶宗旨相同川事可望根本解決乃迄今未得賜覆而前敵各軍均以執事果誠意向南何必向北京辭職所云停戰實係緩兵恐雙方積疑復生衝突尙望仍照前議即飭所部通電各省表示與南方一致行動並望將軍民長官印信送付錦帆即離成都既免食言之譏亦可保梓計無善於此者如仍徘徊瞻顧則棄信背盟之咎惟執事實負之特再進最後忠告之言希於本月十八號以前確切賜覆爲盼

再勸劉存厚等勿蹈反覆踐前言電

萬火急成都劉積之張表方兩兄資州徐師長並轉鍾師長劉陳兩旅長自流井飛轉榮縣威遠嘉定犍爲舒師長劉師長陳汪楊張陳吳鄧廖賴田各旅長鈞鑒接統電敬悉諸君護國護法始終不渝現與西南各省一致進行共伸大義於天下此後內則重敦舊好外則共奠國基不惟川事立平即大局亦有攸賴接閱通電佩慰良深惟前接積之兄卅一電云以四川軍政交付錦帆接收收解甲歸田以明素志此間極所同意而迄今未見實行又據前方各軍電稱迭接駐資中榮威犍爲之徐鍾舒劉各師長暨各旅長前後派員接洽及來往電函一致向南均屬誠意惟在太纒檢獲積之致陶邦本崇密電一件內開我軍停戰議和原在急圖整理但敵之能否如約尙不可知務希各方將士於此停戰日期在原陣地綫內切實布置堅築工事嚴陣以待敵人之來攻並待大局之轉圜苟能雙方停戰得之餘裕時間藉以補充子彈前途裨益匪淺也同處漏舟相期共濟等語是停戰議和實屬緩兵之計不惟此間將士羣起猜疑想諸君亦不願弄此狡獪致蹈反覆無常之誚再釀人民塗炭之憂此時爲大局計爲四川計

惟一切盼積之交出軍民兩政派員將印信送至重慶交付錦帆接收尅日離去成都以踐歸田之成言而免川民之浩劫否則空言宣布恐未足以解決川局也特此奉覆希即決行

復慰川中各師長等一致護法電

萬急資州徐師長並轉鍾師長暨各參謀長旅團長梯團長諸君鑒篠午巧未電均悉諸君一致護法並擁戴熊公督川詞意肫誠實深佩服繼堯爲團結同袍永奠川局計昨與如周督軍酌擬條件於號日電商諸君計已達到希即決定實行並盼賜覆

通飭滇川黔軍與劉存厚規約三事電

特萬火急成都劉積之張表方兩兄重慶熊總司令黃總司令朱參謀長並轉但石顏楊各司司令呂袁李各縱隊長資州徐師長並轉鍾舒劉各師長一二三師及各混成旅劉陳陳汪楊陳吳鄧廖賴田各旅長內江顧軍長自流井趙軍長並轉趙總司令丁司令瀘州葉黃兩軍長永寧盧副司令叙府趙旅長老鴉灘何總司令貴陽王總司令鑒

昨接劉張諸君銑日通電宣布與西南各省一致進行擁護約法實深佩服惟川事糾紛爲時已久此時必有確切之辦法乃可望永久之和平現爲鞏固護法團體消除川省後患計特規定三條與諸君約（一）積之表方兩君限於本月廿六號以前通電京內外聲明引退即離開成都（二）一三兩師及各旅通電京內外聲明自廿六日起脫離積之關係受熊君錦帆節制其無此項通電之部隊聯軍即認爲無意向南當共除之（三）一三兩師照錦帆巧申電讓出兩資簡陽分別移駐仁壽榮威一帶以表示誠意以上三條均限於本月廿六號以前實行熊君克武並即同日宣布就職若屆期未能照辦則銑日通電聯軍仍認爲非誠意之表示事關重要立候諸君決行

請馮代總統特任熊克武督川電

特萬急北京馮代總統鈞鑒華密頃據呂司令超電稱我軍已於昨日完全克復成都劉存厚張瀾潛逃成都秩序安靜如常等語查川省底定軍民各政不可無人主持當經電令重慶鎮守使熊克武權行擔任該鎮守使勤勞夙著功在國家擬請鈞座特任

爲四川督軍兼省長以奠川局而愜羣情不勝迫切待命之至

促熊總司令錦帆綜攝川省軍民兩政電

十萬火急貴陽劉督軍王總司令重慶熊總司令黃總司令朱參謀長并轉但司令石司令顏司令楊司令李袁呂各縱隊長內江顧軍長瀘州黃葉兩軍長自流井趙軍長并轉趙總司令叙府趙旅長永寧盧副司令老鴉灘何總司令資中徐師長并轉鍾舒劉各師長劉陳汪楊張吳鄧廖賴田各旅長暨前接劉存厚卅一電云將軍政交付錦帆接收並表示與西南一致行動嗣銖日通電業經宣布與西南一致進行擁護約法當經復電勸令仍踐前言解甲歸田交出軍政去後前接舒師長汪鄧廖各旅長暨全體官佐等復申電稱前於寒日請錦公早日就職以維川局在案現本師旅團營定自本月巧日起與西南各師一致擁護約法共贊新猷尙希錦公速即就任早奠全川等語查熊君錦帆聲威夙著民望所歸奠定全川責無旁貸現經劉君積之交出軍政後接舒師長等電催熊君就任出於至誠並各師長電函多屬同意足見熊君綜攝四川

軍民兩政衆意僉同尙希即日在渝宣布就職以慰羣情而定川局不勝企盼

### 覆廣東孫中山電

廣東孫中山先生鑒真電悉遠承慰勉感佩極深現已克復成都川局大定善後一切正與錦帆籌商尙乞時頒教言以匡不逮

### 復重慶章太炎電

重慶章太炎先生鑒得有電本欲一笑置之雖然自居渾涵而聽先生蹈失言之過非所以優禮賢者慎以蕞爾起抗羣兇舉鼎絕臙自知竭蹶然以法紀不宜漸滅國本不宜顛覆故悉索敝賦扶義而起並非報眦之怨亦非存侵略之思也自與師以來喋血千里蜀中叛徒僅乃戡定當湘鄂告急正我軍駢死苦戰之時卒難分兵應援心肝爲之俱裂非如公等之搖筆鼓舌即可以會師武漢直搗幽燕也繼堯前此主張和平以內爭未息外患交乘思得一當以弭國難耳彼昏不知終未悔禍滇省雖止剩一矢二石終必堅持此護法救國之初心寧能澳忍求全韓鳳樓奉使北行之說不識先生

從何處得此夢囈之言在先生暢所所言非必故爲撻缺然擇言不審足以搖惑聽聞恐互相猜疑或至詿誤大局望先生慎之

致代總統各處陳明出師湘鄂電

特十萬火急南寧陸巡閱使陳聯軍總司令廣東莫督軍伍唐兩總代表李協和李印泉先生貴陽劉督軍長沙譚聯軍總司令岳州陳總司令並轉黎石兩總司令遂寧熊總司令上海岑西林譚組菴先生鑒頃致馮電文曰劉存厚張瀾逃逸川局大定當經專電報明並請任命熊克武兼任四川督軍省長以奠川局在案願戰事告終痛定思痛迴憶數月苦戰死傷狼藉閬里邱墟因當局一念之私竟釀成一方浩劫環顧滿地瘡痍不覺淒然淚下充此不忍之念又覺刀鋸鼎鑊已迫於三楚子遺之前則討湘之布告是已夫譚程舉兵尙非潢池盜弄除指斥非法政府外曾無一語上千尊顏縱使按律嚴科以視稱兵犯闕亦自有間以鈞座之明寧復昧此是故道路之言羣疑有所擬制証以贛督通電討湘有令非元首仁恕之初心等語愈復恍然討伐而非元首之

初心是誠何事萬一刼制日甚久假不歸鈞座將若之何自討伐令出湘鄂之民皆惴惴焉朝不保夕呼籲之慘亦不忍聞矣繼堯惟不忍於蜀民懼湘鄂且爲之續而非湘鄂而湘鄂者且相續於不已故竊願收合蜀中餘燼嚴戒出峽待命於湘鄂之野俾鈞座有辭於刼制之徒庶仁恕之初心可以徑遂而湘鄂與非湘鄂而湘鄂之民亦不致重罹浩劫耳謹電報聞伏維原察等語特聞

### 通致京省各處冀息兵端而延國脈電

分送北京馮代總統國務院分送各省督軍省長各都統各巡閱使各鎮守使各護軍使各師長各旅長各省議會各報館分送滬岑西林譚組蒼汪精衛孫伯蘭張鎔西先生分送甯陸巡閱使陳督軍分送粵孫中山伍秩庸唐少川陳競存李協和李印泉先生分送湘譚聯軍總司令鈕惕生岳州程總司令並轉黎石唐各總司令成都熊總司令武穴馮旅長鑒本月支日接馮旅長寒電言之直切讀者動心竊念此次西南各省宣言護法所擁護者國本而非以爭政權所指斥者非法內閣之段祺瑞一人而於北

方軍人無與故自段祺瑞免職各省相約罷兵乃段祺瑞因個人權位之私造北洋團體之說挑南北之惡感釀湘蜀之戰爭以致蘇贛方面力主調停而天津會議乃極端主戰元首方頌和平布告而曹張復南下進兵繼堯以兵燬一開必難收拾迭電呼籲迄無效果今主張和平之王總理陳督軍皆相繼罷斥而岳州又傳烽矣試問主戰諸人有何不得已而用兵前次湘蜀之戰攘搶經年血肉盈山死骸徧野流亡未集滿目瘡痍誰爲爲之而至於此不意槍林彈雨又復集於湘鄂之間吾民何辜乃不容於民國且北方用兵一次則借款購械一次喪國家之權利增人民之負擔乃至賤人民之脂膏以購槍械遂藉外人之槍械以殺人民此真馮旅長所謂視同胞爲仇讎以國家爲孤注者也夫以公等之力征經營即使能成子孫帝王萬世之業而元氣凋喪國豈能存况潮流所趨人民所嚮雖有大力莫之能抗北方軍同此心理亦豈能隨一二人之喜怒以爲此無意識之犧牲尙冀立息兵端稍延國脈若必逞一人之意以促全國之生機則國家興亡匹夫有責無論南北當共圖之

復汕頭陳總司令進攻閩中電

汕頭陳總司令覽篠芻兩電均悉時局至此已無調和餘地現北軍既着着進逼爾希整率貴部即日攻閩此間以編援鄂軍大舉東下并以奉聞

商請西南各省制止中日條約電

萬急南寧陸巡閱使廣東伍總代表海軍林總長莫督軍並轉上海岑西林先生韶州李總指揮李督辦貴陽劉督軍成都熊督軍韶州譚聯軍總司令并飛轉程總司令鑒新成密西林先生宥電辦法深合機宜果能因此而遏北京之亡國條約固可以達吾輩救國之苦衷設段逆壹意孤行亦可以喚起輿論而共討此賣國賊惟鄙意有應行商榷者兩端一善後會議解決法律政治諸問題關係極爲重要若由北京集合則可任意操縱且海內名流亦苦無標準恐蹈約法會議之覆轍擬酌改爲果中央不簽亡國之約允由各省分派代表到滬並邀集海內名流迅開善後會議解決法律政治諸問題自應即行停戰聽我國民最後之裁判二西南此舉純爲救亡並非屈服於段氏

段氏不去則法律政治決無圓滿解決之期將來西南各省對於法律政治各問題所爭之點當以何者爲限度此雖宜付諸善後會議然此時不能不先行討論庶各省可循同一之步驟而不至自潰藩籬以上兩端敬乞公酌並希由日公簽名通電發表爲禱

因爭中日密約事通令各軍知照電

急成都分送顧軍長瀕總司令瀘州趙軍長自流井趙總司令盧副司令丁總司令巫山葉軍長黎總司令重慶王總司令叙府何總司令李總司令趙旅長順慶石總司令并轉各旅團長均鑒此聞於四月二十七號與伍秩庸陸幹卿諸公聯銜致北京馮代總統一電文曰北京馮代總統鑒聞日本以共同出兵爲名向我國提出條件關於陸軍者九款關於海軍者兩款其旨爲軍械軍用品原料互相補充陸海陣地圖互相交換因軍行動彼此以交通便利彼此海陸等軍官代爲設計指揮操練此項條件無軍事行動時亦可適用於相當之地點共同籌設斥堠其照會係三月廿四日在東京交

涉五月一日實行以上各節雖未敢信其必有惟中西報紙均有紀載言之鑿鑿恐非無因乍聞之下舉國驚駭條件若見實行則舉國軍事上之用品操練指揮要隘供給運輸彼盡代爲處置名爲共同實則合併亡國慘狀即在眉睫現在德方力戰西歐實無東侵之意俄與德媾和無助德攻我之心既無共同出兵之理由即無定立條件之必要即使將來因防禦之關係與日本共賦同仇或爲事實所需然立訂條約必須按照約法第三十五條由國會通過斷不能任一二武人秘密把持以致專欲禍國如此其極也現在英法美在戰聯軍何常非統屬於沃璧元帥之下共同作戰大敵當前統一軍機其關係之密切當更甚於中日之於東亞者然未聞有如此嚴酷之條件深恐名爲共同出兵防禦德俄實利借外人財力兵力以壓迫護法義師不惜犧牲全國以爲意氣之爭者查民國四年日本向我要求二十三條件之第五號其中要點爲聘日人充政治軍事等顧問緊要地方聘日人爲警察官由日本採辦一定數量之軍械或在中國設立中日合辦之軍械廠等項當時舉國呼號一致反對項城亦不肯承認結

果僅乃得免痛定思痛曾幾何時復發生此種苛毒條件利害與前更甚數倍從此軍用物品則所攜如意海陸要塞則扼守由人門戶洞開聽人指揮內尤酷者在平時亦可適用直永遠無修改廢止之權以東亞爲範圍即利在我國是無處不可爲彼之被動也三韓覆轍可爲劇心稍有天良奚至於此在彼之執政者乘機以增自國權利何足爲異最可痛者我之執政者壞法亂紀一意孤行不顧國家將國權斷送聽聞此種條件之交涉純由段祺瑞及其二三武人主持冀得外交助力藉以壓迫南服國民不知滅亡慘禍孺孺所知寧與絕交斷難含忍此次西南義旅不過爲法律而爭兄弟圍牆實非得已倘當局有悔禍之誠則丁茲國脈衰弱外交緊迫時期無事不可磋商就緒何至以賣國條件爲固權贖武之具我公居元首之位握統治之權如對於亡國條件甘心簽押則天下後世論亡國罪魁豈能曲恤若果有其事應請嚴行拒絕若確無之則請明白宣布以祛羣疑否則非法結約貽禍國家一息尙存誓不承認也伏祈明察等語合電知照

斥揭段祺瑞等私訂密約請各省合力救阻電

特念各省督軍省長護軍使都統鎮守使各省議會商務總會均鑒頃見中外報載前月二十四日駐日公使章宗祥與日本外務省互換照會一通內容兩款如下第一款中日兩國爲防止敵人勢力東漸起見今約定軍事上取一致之行動第二款前項共同行動之辦法由兩國軍事當局協定之又報載日本提出條件共十七款開端聲明爲保全東亞和平乃其內容極爲重大因政府嚴守秘密未能詳知而其要點如下(甲)兩國軍需品軍械須互相補充(乙)兩國須互換軍用地圖(丙)凡軍事設計及軍隊之調遣訓練指揮等事兩國得互相代之(丁)日本得於華境相當地點設置斥候屯駐兵隊(戊)日本得於華境相當地點建築要塞(己)日軍所到地得發行軍用票(庚)華官須出示禁止人民勿妨害日軍行動(辛)以上各項辦法平時亦有效力(壬)以上各項辦法兩國軍事當局議定後須經兩國政府批准又兩國政府負秘密責任(癸)兩國之中某方欲增改或廢止此項辦法時須六個月以前互相通知其

關於鐵路運輸軍艦調遣亦俱規定此外種種實行辦法兩國軍事當局得隨時協定之又聞兩國軍事當局日本爲公使館武員齋藤少將中國爲靳雲鵬業經談判數次將於日內簽字各等語夫我國因參加歐戰與日本共同出兵則協定出兵辦法亦自無可議乃觀所提條件日本得指揮管理中國兵隊得隨地駐兵得隨地設置要塞得利用中國兵工廠得隨地發行軍用票且此條件適用之範圍既未限定地點而渾云保全東亞和平亦未限定時期而竟云平時亦有效力如果簽字則中國亡矣繼堯前曾會同伍秩庸陸幹卿諸公電陳馮代總統力阻簽約惟聞此次締約實出於段祺瑞等一二人段氏欲貫徹以武力平服西南之主張不能不向外借款購械欲借款購械不能不締此約以爲報酬逞一時意氣之私遂不憚爲此賣國之事夫段氏既仇視西南亦不應仇視全國爭一田而敗全產雖匹夫不肯爲豈身秉國鈞而智不及此况西南護法各省所希望者不過尊重約法維持國會耳約法爲全國應守之法規國會爲全國人民之代表並未挾南北之成見亦非爲局部之爭持使執政者一切設施不

軌出法律範圍之外則全國自趨於一軌欲謀國家統一保政府威信舍此其道何由  
今不求諸法治而欲以力征經營驅吾南北無仇無怨之父兄子弟於疆場而使之肝  
腦塗地兵戈所至城邑爲墟乃猶未已而竟至假手外人以墟吾祖國甘心爲吳三桂  
李完用之續以斷送國家非喪心病狂何以至此諸公或身任封疆或主持輿論夙抱  
愛國之忱同有救亡之責尙冀共抒籌策拯此淪胥民國存亡在此一舉不勝迫切盼  
禱之至

以援鄂事復知上海岑西林電

急上海岑西林先生鑒協密敬寢兩電悉和議絕望戰事復開前接月波頌雲來電此  
間已飭川中各軍先行抽調兩師東下援鄂繼堯亦准於日內進駐重慶以便指揮岳  
州戰况如何李陳有無舉動尙乞見示至爲盼禱

其二

萬急上海岑西林先生鑒協密有勘兩電敬悉在粵滇軍因將領處置失當以致內部

意見紛歧前曾派進卿赴粵調查以期設法整頓嗣聞印泉到粵當可賴以維持頃已電商印泉擬以爲靖國聯軍第六軍軍長矣岳州戰事激烈亟應分兵應援此間已組織援鄂軍司令第一第二兩路先行東下其第三第四兩路稍爲整備亦即尅日出師知注奉聞

其三

急上海岑西林先生鑒協密電江電敬悉前接敬寢勸各電均經電復未審登鑿否此間聞岳州戰訊當即抽調各軍東下援鄂前已派黃復生爲援鄂第一路總司令葉荃爲第二路總司令已令集中渝城尅日東下其第三路袁祖銘第四路田鍾毅等亦正調集所部整備出師矣至川事早經責成錦帆並令速進成都宣佈就職計日內當可抵省惟川事雖定而善後頗費經營現各路義軍漫無軍紀而新附之衆趨嚮不明默察近情殊多隱患現正與錦帆籌議辦法以期消患未形也知注奉聞

致日本國議會電

急大日本帝國議會鑒敝國自段祺瑞秉政以來蹂躪國會迫逐元首煽動復辟庇護叛徒違法專權罪浮袁氏我雲南鑒於國家多故由政府無尊重法律之心故謹提出四條要求政府（一）大總統有事故時當然由副總統代行職權但故障既去總統仍應復職否則應向國會辭職照大總統選舉法第五條第一項辦理（二）國會非法解散不能認爲有效應即召集國會（三）國務員非經國會同意由總統任命不能認爲適法（四）稱兵抗命之禍首應照內亂罪按律科辦以上四端皆以約法爲根據並非適分要求蓋敝國憲法未制定以前約法即爲國家之根本法必約法得所保障斯國家可望治安乃政府未加採納而段祺瑞遂派兵入湖南四川兩省欲以武力壓服西南西南各省迫於勢之無可如何聯合滇黔川粵桂湘各省出師討逆所幸連戰皆捷湖南四川兩省已盡入聯軍範圍代總統馮國璋主張和平勸告停戰南方即停止進兵靜候解決乃段祺瑞等復開天津會議極端主戰派兵南下進攻荆襄南北戰爭恐遂成爲事實此匪特敝國之不幸抑東亞和平之一大危機也此時欲保持東亞和平

必先謀敵國之不紛擾然近時所以常紛擾不絕者厥有二大原因一則政治社會其居要職者多屬舊時官僚不能應世界之潮流以刷新政治甚至謀推翻國體冀返於專制之弊風二則北洋軍閥時存以武力統治中國之野心厲行武斷政治而國家法律盡爲所摧殘此兩種思想不消滅則敵國永無寧息之期故此時南方各省所以羣起而力爭者在國本而不在政權而謀所以解決此爭端者在法律而不在武力此敵國國民之共同目的不能不求諒於友邦者也貴國數年以來常以維持東亞和平增進中日親善爲主旨敵國革新事業受貴國之賜者良多乃近因北京政府違悖人民之意思阻害國家之進步而國事益因以俶擾不寧想中日兩國國民利害本屬一致當不無同情之感也特撮舉事實一陳於貴國議會之前幸詳察焉

復天津全國商會聯合會電

萬急天津全國商會聯合會鑒四月敬電本日始到藉悉諸公憂國愛民之忱西南各省宣言護法並非爲意氣之爭誠不忍見兵戎之慘迭經電陳馮代總統請以和平解

決時局乃當局者不能尊重法律反求逞於干戈欲借助於外人以屈服乎民意馴至兵連禍結國弊民疲今外患憑陵國將不國諸公電請停戰以亡救危同此國民無不敬佩尙乞妥籌辦法協力進行是所盼禱

#### 復南京省議會電

南京省議會鑒文電悉自僉壬柄國法紀陵夷不得已乃訴諸武力冀展國基近陳李各督軍皆主和平解決此間亦復電贊同現正籌商辦法但使法律有相當之保障則國家自可望有長久之治安諸公卓識遠謨當亦同茲感想承注奉復敬乞教言

#### 復甘肅省議會電

蘭州甘肅省議會鑒虞電悉至言讜論具佩苦心惟國家欲求長久之治安必須法律有堅確之保障現國中諸重要問題果能如諸公所云依法解決則兵禍可望立消亦繼堯等所深願也特此奉復

#### 重明出師本旨訓勵本省官吏軍民電

萬急雲南劉師長由運使唐參謀長並轉各隊長易黃兩廳長張交涉員鄭司令大理孫司令蒙自繆司令臨安李旅長譚隊長開化錢旅長李團長楚雄戰會辦何團長元謀飛送會辦華指揮騰越由道尹羅團長昭通蔣司令鎮雄林隊長東川送巧家徐團長曲靖送陳行營陳參謀河口麻栗坡督辦阿迷局局長思茅丁道尹馬統領各局分送各縣知事覽我滇自護國之役重奠共和義聞仁聲中外稱頌乃北方狙專制之舊習嫉義師之聲威時思壓服西南橫行天下段祺瑞柄政以來蔑棄約法蹂躪國會懲惡叛徒迫脅元首並倡以北系武力統治中國之說浙湘川粵相繼被其構亂而其鷹瞵虎視尤注意於吾滇北軍之入川湘恣行屠戮姦淫擄掠慘不忍聞吾滇首義之區寧能甘此荼毒本督軍爲擁護國家保全地方計不憚重勞吾父老子弟復興靖國之師誠冀忍痛苦於一時而將來免鋒鏑之患拒敵氛於境外而內地得雜席之安也幸天相我滇師行獲利逆軍入蜀已告蕩平粵桂川湘黔又與我同心禦敵段逆窮蹙計無復之陰賊姦徒謀擾內部我滇官長人民各懷忠義決不至受姦徒之蠱惑以反噬

同胞但本督軍此次出師之本旨與愛護桑梓之苦衷不能不重申明俾軍民共喻斯意如有不顧大局妄造謠言勾結匪徒圖謀不軌者務即嚴緝懲辦以除奸宄而靖地方特此通布仰即轉飭所屬一體遵照

### 復北京由幼仙電

百萬急北京汪伯唐先生轉由幼仙兄鑒幼密元電悉國事糾紛迄難解決如得東海出而斡旋大局必有轉機承示各情極深欣慰惟此時商榷辦法當從全局着想不宜專從雲南着想蓋此次爭議非止雲南問題也至關於雲南方面應行商榷之事除駐兵協餉請照從前電商辦法外川督一席仍以熊克武爲宜我軍在川實力甚厚現已奠定全境劉鍾逃赴寧羗惟繼堯迭經宣言決不願任川督但求川事主持得人熊克武穩練明通必能裨益川局尙希轉達前途此間切盼和平兄所深悉惟北京當局意見能否一致調和辦法如何進行乞探明速示爲禱

### 以赴渝援鄂事復知王季文參議電

廣東張師長轉王參議季文鑒季密刪電悉昨接湘電岳鄂戰事復開西南各省聯軍  
惟有積極備戰現在成都已下此間已決計進駐渝城籌商川省善後事宜并編援鄂  
軍刻日東下也此復

其二

急南寧陸巡閱使轉王季文參議鑒季密接刪電知己赴舊謁幹老晤商詳情希隨時  
電告我軍已於昨日克復成都劉存厚張瀾均已潛逃聞麴聚綿竹江油等處與秦軍  
聯絡然已勢窮力絀不難一鼓蕩平如大局尙無解決之期此間當可分兵東下也知  
注奉聞

其三

急廣東海珠伍秩庸先生轉王季文參議鑒季密宥電悉大局又變戰事復開西南尤  
宜協力進行以謀鞏固此間已決定派兵援鄂黃復生葉香石爲援鄂第一二兩路總  
司令尅期出師筱齋所部之田鍾毅一混成旅電輪所部之袁祖銘一師亦繼續進發

堯亦准於日內進駐渝城川中軍民兩政已令錦帆主持並將新附之師改編出陝知注特聞

糾正雲南主義謬說致陸巡閱使等電

十萬火急陸巡閱使粵莫督軍並轉滬岑西林先生湘譚聯軍總司令程總司令黔劉督軍滇劉師長山運使成都熊督軍歸州轉黎總司令王總司令黎頃閱上海各報載有張藻林與龍子忱往來密函謂彼此攜手實行雲南主義並謂繼堯迭派專員赴瓊接洽開議條件已有頭緒等語殊堪詫異查滇軍兩次與師皆爭國家之安危並非爭局部之勢力所謂雲南主義究係是何名詞至龍子忱處當未就巡閱使以前繼堯曾有電勸令與西南一致護法此外並無派員赴瓊接洽開議條件之事西南各省利害相關於勢於情萬無此理今報載張或出於敵黨之挑撥以離間西南繼堯行事自有本原本可置之不理惟任其傳播終屬搖惑聽聞故特略陳梗概即祈揭諸報端以關邪說是所至禱

會澤靖國文版 卷三

